

Na osnovu člana 171. Zakona o socijalnoj zaštiti, zaštiti civilnih žrtava rata i zaštiti porodice sa djecom ("Sl. novine Kantona Sarajevo", br. 38/2014 - prečišćen tekst, 38/2016, 44/2017, 28/2018 i 52/2021), člana 5. i 62. Zakona o dopunskim pravima boraca- branitelja (Službene novine Kantona Sarajevo, broj 18/2021- prečišćeni tekst), člana 10. i 68. Statuta Općine Centar Sarajevo-prečišćeni tekst ("Službene novine Kantona Sarajevo", broj 23/04) i člana 87. Poslovnika Općinskog vijeća Centar Sarajevo-prečišćen tekst („Službene novine Kantona Sarajevo“, br. 23/04, 11/13 i 13/17) Općinsko vijeće Centar Sarajevo je, na Četrnaestoj sjednici, održanoj dana 27.01.2022. godine, donijelo:

ODLUKU

O KRITERIJIMA I NAČINU RASPODJELE NOVČANIH SREDSTAVA ZA DODJELU JEDNOKRATNE NOVČANE POMOĆI BORAČKOJ POPULACIJI

DIO PRVI- OSNOVNE ODREDBE

Član 1. (Kriterij i način dodjele)

- (1) Ovom Odlukom uređuju se kriteriji i način dodjele jednokratne novčane pomoći boračkoj populaciji u stanju socijalne potrebe.
(2) Jednokratna novčana pomoć ostvaruje se jednom u toku kalendarske godine.

Član 2. (Korisnici i cilj)

- (1) Socijalnom potrebom u smislu zakona smatra se trajno ili privremeno stanje u kome se nalazi određeno lice ili porodica, prouzrokovano ratnim događajima, elementarnim nesrećama, opštom ekonomskom krizom, psihofizičkim stanjem pojedinaca ili drugih razloga, koji se ne mogu otkloniti bez pomoći drugog lica.
(2) Cilj pružanja novčane pomoći na osnovu ove Odluke je približno dostići minimalnu materijalnu sigurnost i nezavisnost pojedinca i porodice u zadovoljavanju osnovnih životnih potreba.

DIO DRUGI – OSTVARIVANJE PRAVA

Član 3. (Lica koja ostvaruju pravo)

- (1) Pravo na jednokratnu novčanu pomoć u skladu sa ovom Odlukom imaju sva lica koja imaju priznat status:
1. Borca/branitelja Bosne i Hercegovine;
 2. Ratnih vojnih invalida i njihovih porodica;
 3. Članova porodica šehida i poginulih i nestalih boraca/branitelja i umrlih ratnih vojnih invalida;
 4. Organizatora otpora;
 5. Veterana/prvoboraca;
 6. Članova porodica umrlih demobilisanih boraca;
- (2) Sa borcima-braniteljima, u smislu ove Odluke, izjednačeni su u pravima učesnici narodnooslobodilačkog antifašističkog rata 1941- 1945. godine, čiji je status utvrđen rješenjem nadležnog organa.

Član 4. (Uslovi za ostvarivanje prava iz Odluke)

(1) Licima koja su u stanju socijalne potrebe, u skladu sa ovom Odlukom smatraju se:

- Lica koja se nalaze na evidenciji nezaposlenih;
- Lica čija primanja ne prelaze iznos najmanje penzije u FBiH po članu domaćinstva;
- Lica koja uslijed nelikvidnosti firme nisu ostvarila pravo na lični dohodak u posljednja tri mjeseca do dana podnošenja zahtjeva;

(2) Uslovi za ostvarivanje prava utvrđenih ovom Odlukom su :

- a) da podnosilac zahtjeva ima prebivalište na području Općine Centar Sarajevo;
- b) da je podnosilac zahtjeva lice definisano članom 3. ove Odluke;
- c) da niko od članova zajedničkog domaćinstva podnosioca zahtjeva nije vlasnik preduzeća ili samostalne radnje ili ima registriranu dopunsku djelatnost (da nema duga po osnovu javnih prihoda);
- d) da niko od članova porodičnog domaćinstva podnosioca zahtjeva nije ostvario drugi vid jednokratne novčane pomoći iz djelokruga rada nadležne Službe.

(3) U istoj kalendarskoj godini, lica koja su ostvarila pravo na jednokratnu novčanu pomoć putem Odsjeka za socijalnu zaštitu, ne mogu ostvariti pravo na jednokratnu novčanu pomoć po osnovu ove Odluke.

DIO TREĆI - KRITERIJI

Član 5. (Osnovni i dopunski kriterij)

(1) Minimalni iznos jednokratne novčane pomoći, utvrđen ovom Odlukom je 250,00 KM, a maksimalan 1.000,00 KM.

(2) Visina jednokratne novčane pomoći utvrđuje se prema osnovnim i dopunskim kriterijima.

(3) Osnovni kriterij za utvrđivanje visine jednokratne novčane pomoći je broj članova domaćinstva i utvrđuje se u novčanim iznosima kako slijedi:

- Za jednog člana domaćinstva 250,00 KM
- Za dva člana domaćinstva 260,00 KM
- Za tri člana domaćinstva 270,00 KM
- Za četiri člana domaćinstva 280,00 KM
- Za pet ili više članova domaćinstva 290,00 KM

(4) Dopunski kriterij za utvrđivanje visine jednokratne novčane pomoći su:

1. Stepen invalidnosti.
 - 20%-40% invaliditeta u iznosu od 30,00 KM
 - 50%-70% invaliditeta u iznosu od 40,00 KM
 - 80%-100% invaliditeta u iznosu od 50,00 KM
2. Porodicama bez primanja koje ne posjeduju stambenu jedinicu ili se nalaze u podstanarskom odnosu u iznosu od 30,00 KM;
3. Porodicama bez primanja koje posjeduju stambenu jedinicu u iznosu od 20,00 KM;
4. Broj djece na redovnom školovanju do 25 godina starosti:
 - Do troje djece u iznosu od 20,00 KM;
 - Četvero i više djece u iznosu od 30,00 KM;

- 5. Broj nezaposlenih članova domaćinstva:
 - Do troje nezaposlenih u iznosu od 20,00 KM;
 - Četvero i više nezaposlenih u iznosu od 30,00 KM;
- (5) Prava na ostvarivanje jednokratne novčane pomoći po osnovu dopunskih kriterija iz stava 4. ovog člana se međusobno ne isključuju i dodaju se na prethodno utvrđeni osnovni kriterij iz stava 3. ovog člana.
- (6) Lica iz člana 3. Odluke, kojima je potrebna pomoć u liječenju van BiH, ostvaruju pravo na jednokratnu novčanu pomoć do 1.000,00 KM uz obavezu dostavljanja preporuke nadležne zdravstvene ustanove za liječenje van granica BiH i predračun za troškove liječenja, primjenjujući odredbe člana 4. ove Odluke.

Član 6. (Izuzetci)

- (1) Izuzetno od odredaba člana 5. Odluke, uz preporuke Službe i mišljenja Komisije za boračka pitanja, Općinski načelnik može povećati iznos jednokratne novčane pomoći za podnosioca zahtjeva koji pored osnovnih i dopunskih kriterija imaju teško hronično oboljenje (onkološki pacijenti, cerebralna paraliza, hepatitis i sl.) ili se trenutno nađu u stanju socijalne potrebe koja je izazvana vanrednim okolnostima (požar u stambenoj jedinici, poplava, smrtni slučaj u porodici). Povećanje može biti ukupno do iznosa od 600,00 KM.
- (2) Općinski načelnik u hitnim slučajevima može dodijeliti jednokratnu novčanu pomoć u slučajevima kada smatra da je neophodno hitno pomoći određeno lice ili porodicu, koji su obuhvaćeni članom 3. Odluke, poštujući odredbe člana 4. i 5. Odluke.

DIO ČETVRTI – POSTUPAK DODJELE

Član 7. (Način ostvarivanja prava i postupanje po zahtjevu)

- (1) Sredstva sa budžetske pozicije predviđena za ove namjene dodjeljuju se na osnovu javnog poziva koji se objavljuje na web stranici Općine i ostaje otvoren do kraja tekuće budžetske godine ili do utroška planiranih budžetskih sredstava.
- (2) Jednokratna novčana pomoć utvrđena ovom Odlukom dodjeljivat će se na osnovu podnesenih zahtjeva, a u skladu sa objavljenim javnim pozivom.
- (3) Zahtjevi za ostvarivanje prava na jednokratnu novčanu pomoć podnose se službi nadležnoj za poslove boračko invalidske zaštite putem protokola Općine.
- (4) Zahtjevi će se rješavati po redosljedu podnošenja, osim u slučajevima kada Služba utvrdi da je određenom zahtjevu potrebno dati prioritet prilikom rješavanja zbog složenosti stanja socijalne potrebe u kojem se nalazi podnosilac zahtjeva, uz obavezu da razloge hitnosti obrazloži Komisiji za boračka pitanja.
- (5) Služba je dužna u roku od 30 dana od dana podnošenja zahtjeva obavijestiti podnosioca zahtjeva o statusu predmeta.
- (6) Služba priprema prijedlog liste podnosioca zahtjeva za dodjelu jednokratne novčane pomoći, sa obrazloženjima i istu dostavlja Komisiji za boračka pitanja.
- (7) Na predloženu listu Službe, Komisija za boračka pitanja daje mišljenje, a rješenje donosi Općinski načelnik.
- (8) Protiv navedenog rješenja može se izjaviti žalba u roku od 15 dana od dana prijema istog. Žalba se podnosi Drugostepenom organu za žalbe koji odlučuje po žalbama.
- (9) Dokumentacija koju je potrebno priložiti uz zahtjev po objavljenom Javnom pozivu biti će navedena u posebnom obrascu koji će biti dostupan na web stranici te info-pultu Općine Centar Sarajevo. Zahtjev za ostvarivanje prava čini sastavni dio ove Odluke i isti se može mijenjati neovisno od odredaba Odluke.

- (10) U slučaju da organ nadležan za postupanje iscrpi raspoloživa sredstva za tekuću kalendarsku godinu, Javni poziv se povlači a zaprimljeni zahtjevi će se rješavati po prioritetu tokom slijedeće kalendarske godine.

Član 8.

(Neispunjavanje uslova za dodjelu jednokratne novčane pomoći)

- (1) Ukoliko se iz priložene dokumentacije ne može utvrditi da li podnosilac zahtjeva ispunjava uvjete iz člana 5. ove Odluke, nadležna služba može po službenoj dužnosti tražiti i dodatnu dokumentaciju.
(2) Ukoliko se utvrdi da nisu ispunjeni uvjeti za ostvarivanje prava na novčanu pomoć u skladu sa odredbama ove Odluke, podnosilac zahtjeva će o tome biti obaviješten aktom nadležne službe.

Član 9.

(Nadležnost)

Poslove u vezi ostvarivanja prava propisanih ovom Odlukom obavlja općinska služba nadležna za poslove boračko-invalidske zaštite.

Član 10.

(Isplata sredstava)

Isplata jednokratne novčane pomoći vršit će se putem nadležne službe za finansije uplatom na tekući račun korisnika sredstava.

DIO PETI- ZAVRŠNE ODREDBE

Član 11.

(Prestanak važenja propisa)


Stupanjem na snagu ove Odluke prestaje da važi Odluka o kriterijima jednokratne novčane pomoći boračkoj populaciji u 2005. godini („Službene novine Kantona Sarajevo“, br. 21/05,20/08 i 07/16),

Član 12.

(Stupanje na snagu Odluke)

Ova Odluka stupa na snagu narednog dana od dana objavljivanja u Službenim novinama Kantona Sarajevo, a ista će biti objavljena i na Oglasnoj ploči i web stranici Općine Centar Sarajevo, a primjenjuje se od 01.01.2022. godine.

Broj: 01-11-774/22
Sarajevo: 27.01.2022. godine.



OVA ODLUKA JE OBJAVLJENA NA OGLASNOJ PLOČI OPĆINE CENTAR SARAJEVO